


KUNA NKENI YA NSANGU YA MBOTE...

KUNATA BANTU NA YESU

JEAN 1: 40-42



Mene salama na diboko ya : Rév KITAMBILA TIMOTHEE

EVANGELISTE 35° CUEBC.

KUYANTIKA

Ntoto ya mvimba, ti bima ya kele na kati, yonso kele ya Nzambi . Nzambi kele ti kiyeka na zulu ya bima yonso. Kusamba ba Nzambi ya nkaka, yo kele nsiku. Kubasika 20:3. Nzambi salaka kuwakana ti dikanda ya Israël sambu dikanda yai kunata lusakumunu, mpe kuzabisa bantu yonso na nsi ntoto, nani kele Nzambi ya kieleka ? Israël vandaka ve dikanda ya kuluta mfunu na meso ya Nzambi. Kinduku yai kele sambu Israël kunata kitemwe ya mambote ya Nzambi ya kieleka, bo vanda ba missionnaires. Kansi na kutuba ya mbote, Israël zabaka ve, lukanu ya nzambi ; nde bo kele (nation) dikanda ya ba missionnaires (kunata nsangu ya Nzambi na bisika yonso) yonasi 1 :1-4

Na ntwala ya makanda ya bamimpani, Israel vilaka kiyeka na yandi . yo yina Nzambi tindaka ba prophetes sambu na kubenda Israel na kubalula ntima. Bubu dibundu ya kristo kele vila mpi kiyeka na yandi ya kuzabisa nsangu ya mbote nde : bubu mabansa ya nzambi – kukitula bantu ya kele bakristo balongoki, matayo 18 : 10, matayo 28 :19.

CHAPITRE I : NKI MUTINDU KUNATA BANTU NA YESU ?

Luc 15 : 3-7

A. NANI LENDA NATA BANTU NA YESU ?

Mambu ya kuluta mfunu na moyo ya mukristo, kele yai : ya kunata bantu ya nkaka na yesu. Yai kele kosalu ya kuluta nene na luzingu ya konso mukristo.

Docteur Lyman Becher nataka bantu mingi na yesu na luzingu na yandi yonso. Na ntwala ya lufwa na yandi, nduku mosi yulaka yandi : « Docteur Becher, nki kele kima ya kuluta nene na ntoto? ». Longi yai na zulu ya mbeto ya lufwa pesaka mvutu nde : "KUNATA BANTU NA YESU".

Yesu tubilaka Pierre ti Andre nde : "beno landa mono mono ta kitula beno balobi ya bantu". Matayo 4:19, kele ve ti kosalu ya kuluta nene, kaka yai ya kunata bantu yo kele kosalu ya bakristo yonso.

André ndimaka Yesu Kristo, na nima ya ntangu fioti, yandi nataka mpangi na yandi Pierre na yesu. Jean 1 :41-42. André longaka malongi ya ngolo ve ya basikaka na bible kansi beto kele mona malongi ya Pierre, bonso yayi na kilumbu ya pentecôte, kuna bantu mille tatu ndimaka yesu. Muntu ya mbongo (Mvwama), M. Edwar kimball, D.L Moudy nataka bantu mingi na yesu. Bisalu 2 :36-38

Ba mbuta, ba jeunes ti bana ya fioti lenda nata bantu na yesu. Ebuna konso Mukristo lenda nata bantu ya nkaka na yesu .

B. NKI NTANGU KUNATA BANTU NA YESU ?

Beto lenda sala yo ntangu yonso 24h/24h beto katula mabansa yina ya kutuba nde, beto ta sala kosalu yai kaka na nzo – Nzambi. Yo kele kieleke nde na kundima yesu, mpeve-santu fweti sala kosalu na yandi na ntima ya muntu ya masumu, ku songa yandi masumu na yandi ti kupesa muntu nzala ya kupindula ntima. na ntangu yina, muntu yina ta guluka. Kosalu ya kunata bantu na yesu kele ti nsuka ve, beto fwete sala yo ntangu yonso, bilumbu yonso ti kuna yesu ta vutuka.

Beto kele mona mutindu ba bébé kele butuka bilumbu yonso. Kiteso mosi mpe konso kilumbu bantu fweti butuka na nzila ya kundima yesu na lutwadisu ya Bakristo.

C. WAPI KUNATA BANTU YAI NA YESU?

Beto ta twadisa bantu na yesu bisika yonso ya bantu kele. Bantu ya panzanaka na yerusalem, bo vanda kwenda basika yonso ti kunata nsangu ya mbote Bisalu 8:4. Muntu ya kosalu ya kunata bantu ya nkaka na yesu fweti vanda ti kikesa na kukwenda bisika yonso ya bantu kele.

Ntete na ba nzo ya bantu. Kuna kele kifulu ya kuluta kitoko, sambu muntu kele pima. Na kati ya nzo na yandi mosi kele ve ti mambu ya lenda kangisa yandi nzila. Sadila mpi téléphone kana mpila kele. Tuba kitemwe na nge mosi, mutindu nge balulaka ntima na Yesu. Bisika kele ya mutindu na mutindu ya beto lenda nata bantu na kuyamba Yesu na bantima na bo yonso:

1. Na kati ya Nzo-Nzambi-lukutakanu ya évangélisation ;
2. Na ba nzo ya bantu ;
3. Na ba bala- bala ;
4. Na zandu ;
5. Na hôpital ;
6. Na ba école ;
7. Na prison ;
8. Na ba Bus- Camion- Avion-Moto.

CHAP II : NKI MUTINDU KUVANDA MUNATI YA BANTU NA YESU ?

Beto ta longuka bansiku makumi zole (20) ya ta sadisa na kisalu yai.

1. Konso malongi to ndinga ya bantu ta sadila yo lenda sadisa ve. Kikuma ya malongi fweti vanda kunata bantu na yesu mpamba.
2. Mabansa ya makabu, ya ba dime, ya dibundu ta sadisa ve ata fioti; kansi yo kele kukatula bantu na lufwa ya bilungi ya kele sambu na satana ti ba mpeve ya mbi.
3. Tala mambu ya nene ya lenda sadisa nge, yo kele zole :
 - a. Mpeve-santu,
 - b. Ndinga ya Nzambi

Ndinga ya Nzambi kele kisina ya lukwikilu. Roma 10:17. Ndinga ya Nzambi kele nkeni fweti kubwa na ba ntima. Muntu ta baka moyo ya mvula na mvula kaka na lusadisu ya nkeni ya ndinga ya Nzambi, kana yo kubwa na ntoto ya mbote.

4. Kana muntu kundima yesu ve, yandi kele na lufwa ya mwula na mvula.
5. Zaba na kieleka yonso nde, satana ta kangisa muntu yina nzila ve na kundima yesu.
6. Nge fweti sambaka ntangu yonso sambu na bantu ya masumu. Vanda ntangu yonso ya kifuluka ti mpeve-santu, na mpila nde diboko ya Nzambi kutwadisa nge kilumbu na kilumba.
7. Bunkete ya nitu kele mfunu, sambu na nge ya zola benda bantu na kundima Yesu. Mambu ya lulendo kele mfunu ve, kuditula na ntwala ya bantu nge fweti bika yo.
8. Vanda ti ilungi ya kiese. Pesa bakilo yonso na Yesu, kwenda tuba ve bampasi na nge na muntu yina ya nge fweti nata na Yesu .
9. Pona kifulu ya mbote ya nge fweti solula ti muntu yina ya nge zola nata na Yesu. Zaba mabansa ya muntu, inki yandi zola, pesa mpi muntu yina ntangu ya kutuba. Na nima solula ti yandi ndinga ya Nzambi.
10. Nata bantu na Yesu kansi na dibundu ve.
11. Nge sadila ndinga ya Nzambi, na kusonga nde kana Yesu kele ve, muntu kele ya kuvila. Mbote muntu ya masumu kuzaba nde yandi kele ti nfunu ya kuguluka. *set 2'36*
12. Sadila ndinga ya Nzambi sambu bantu kuzaba mambu ya Yesu mene sadilaka bo. Mambu yayi kele mfunu mingi.
13. Tendula mbote-mbote na nzila ya ndinga ya Nzambi mambu ya muntu fweti sala na kubaka bapromesses (Lusilu) ya Nzambi. Bisalu 2:38.
14. Sadila kaka bible sambu na kupesa mvutu na mambu yonso ya lenda kanga bantu nzila na kundima Yesu.
15. Vanda ti luzitu, ntima ya kuyamba bantu, kukanga ntima, vanda kikesa. Longa muntu malongi ya muntu yina fweti simba ti kusadila.

16. Kubaka ve makasi, na konso mambu ya tapesa mpasi ya nge lenda kutatna ti yo, nge fweti kanga ntima.
17. Sadisa bantu na kubaka décision. Kulutisa ve ntangu na nge pamba-pamba. Kansi nata muntu yina kaka na Yesu mpamba.
18. Sadisa muntu yina na nzila ya malongi-kudipesa na Nzambi, kubaka mbotika, kusadila malongi ya Bible.
19. Longa muntu malongi ya kuvanda longo (Saint)-kudipesa.
20. Kusala ve makambu nswalu-nswalu. Zaba nde nge kele sala sambu na moyo ya muntu ya tweti kuzingamvula namvula.

CHAPITRE III : KUZABISA YESU NA BANTU

Kana beto zaba mbote-mbote mpila ya Kristo mene sala na luzingu na beto, beto ta zola mpi kusonga yo na bantu ya nkaka, mambu yonso ya Yezu mene sadila beto. 2 Bakolinto 5 :17-18. Mambuyai ta tinda beto na kunata bantu mingi na Yesu.

A. DIBOKO YA NZAMBI NA KUNATA BANTU NA YESU Bisalu 8 :26-35.

Kuzabisa nsangu ya Yesu, yo kele kaka ve kulonga ba versets ya Bible, kansi yo kele mpi, mambu ya luzingu na beto mosi ; kusonga mbandu ya mbote. Mpeve-santu ti diboko ya nzambi kele mambu ya kuluta mfunu.

« **NDUKU SAMBU NA KRISTO** » Jean 15 :4.

Mbote Nzambi kusadila nge na kuzabisa muntu mosi nsangu ya mbote ya Yesu bubu.

B. LUZINGU YA NGE MOSI KELE KITEMWE YA NTETE 2 Kolinto 3:2-3.

Luzingu na nge kele kitini ya ntete mpe ya nene, sambu na kuzabisa bantu ya nkaka nsangu ya Yesu. Bisalu 6:3. Muntu mosi ya mayele tubaka nde: "Mutindu ya nge kele yo ta tuba mingi, mpe Bantu ta tanga yo". Keti Kristo me sobaka luzingu na nge?

C. KUZABISA NSANGU YA MBOTE

"**EVANGILE**" kele nsangu ya mbote ya kele zabisa lufwa ya Yesu ti kutelema na yandi sambu na masumu na beto. 1 Bakolinto 15:1-4. Yokele ngolo ya Nzambi sambu na bantu yina yonso ya zola guluka. Roma 1:16. Na yo, kubakisa ti kuzabisa nsangu ya mbote, yo kele mfunu mingi sambu na kitemwe ya ngolo.

1. Ndinga ya Nzambi kele nkeni ya beto kele kuna na ntima ya bantu sambu bo butuka yam pa. 1 Pierre 1:23.
2. Nzambi kele sakumuna kukuna ya ndinga na yandi . Yesaya 55:11
3. Beto yonso lenda kuna nkeni ya mbote. Bakolinto 3:6-7.

NB: Nge longuka ba versets yai ya "DIBOKO YA KUGULUKA"



1. Jean3:16, Bisalu 16:31. kwikila Yesu Kristu.
2. Bisalu2:35, Loma 3:23. Bika masumu.
3. Loma 5:8, 1 Jean 1:9 Lomba ndolula.
4. Jean 1:12 Kuyamba Yesu.
5. Luc 9:23 Landa Yesu.

Samba Nzambi, sambu yandi kupesa nge ntangu ya kuzabisa nsangu ya mbote na bantu ya nkaka. Beno lenda sala yo na kimvuka, kana ve nge sala yo nge mosi.

D. KUZABISA NSANGU YA KRISTO TI NGOLO 1Timothée 1:7.

Nge ta vanda ve nge mosi, ntangu nge ta zabisa bantu nsangu ya mbote ya Yesu.

➤ MPEVE-SANTU

1. Mpeve ta longa beto ndinga ya Nzambi, yandi ta yidika mayele na beto. Jean 14 :26.
2. Mpeve ta tuba fi kiyeka. Matayo 10:19-20.
3. Mpeve ta pesa beto ngolo na ntangu ya kutuba nsangu ya mbote. Bisalu 1:8.

Ndinga ya Nzambi kele mbele ya makasi ndambu yonso zole na nzila ya kimpeve. Efeso 6:14. Beto fweti zaba mbote-mbote nde : Luzingu na beto kele ya mbote, ntima na beto kele ya masonga fi ya kinzambi. Beto fweti lemfuka na mambu yonso ya Mpeve-santu kele zabisa beto. Bisalu 6:5-10.

Nge fweti sambaka bilumbu yonso sambu Mpeve-santu kufuluka na ntima na nge ti kupesa nge ngolo na yandi.

E. MPILA YA KUZABISA NSANGU YA MBOTE

Kana muntu zola kuna nkeni na bilanga, yandi ta sala ntoto ya mbote ya kebutaka bambuma ya mingi, ya mafuka. Nsangu ya mbote ke zolaka ntima ya kudikulumusa. Wapi beto ta mona ntima ya kuyilama, ya mbote ?

« OPERATION ANDRE TA SADISA » Jean 1 :41-42.

NGE KUYILAMA :

Nge sonika mazina ya bantu (1,2,3,4,5, tii 5 etc.) na dititi ya mukanda ; bantu ya nge kele zaba, bayina ya kele bakristo ve. Bo lenda vanda na famille na nge, banduku na nge, bantu kele pipi ya lupangu na beno.

Ex : Zina : 1) Bola

2) Kinsuka

3) Matondo

4) Kitambila.

(2) Nge ta samba mwa ntangu ya nda sambu Nzambi kupesa nge ntangu ya kumona mpila ya kusolula ti bantu yina ya nge sonikaka mazina.

(3) Songa nde nge ke zolaka bo mingi(nge lenda kudia ti bo, pesa bo cadeau, tambula ti bo) etc.

(4) Binga bo na dibundu, kana ve solula ti bo mambu ya diboko ya kuguluka, na kulonguka malongi ya Bible (étude Biblique), na vidéo évangélique, na campagne d'évangélisation.

(5) Nata, sadisa bantu yina yonso na kundima Yesu. Zabisa nsangu ya mbote nab a occasion ya mpila na mpila.

Nge fweti kuyutula ba questions yai :

- Nki nge mene simba na malongi yonso ya ngemene kuwa ?
- Keti nge mene kuyamba yezu na ntima na nge ?
- Keti nge mene kwikila nsangu ya luzingu na nima lifwa ?
- Kana nge kufwa bubu nge nde ta kwenda wapi ?

Sambu na nki Nzambi ta tubila nge nde kota na zulu (paladiso) ? yula ba question ya nkaka ya mutindu yina, sambu na kuzaba nki mambu ya muntu yina, ke tulaka ntima. Keti yandi ke tulaka ntima na yesu... kana bo mene yilama mbote, nge zabisa bo « DIBOKO YA KUGULUKA »

(6) pesa bantu yina kikesa (affermissement) kusiamisa bo. Beto kele binga ya (travail de suite) mambu ya kusala na nima ya muntu mene balula ntima. Kubukisa ve mukristo ya mpa kuzinga luzingu ya mpa yandi mosi. Nge ta baka ve kiyeka ya Pasteur, kansi nge kele sadisa mukriston ya mpa mpila ya mbote ya kuyantika luzingu na yandi ya mpa ti yesu-christo.

CHAP IV : KUYELA YA MUKRISTO

Moyo ya kimpeve fweti kuyela na nzila ya malongi bonso yai : nge ta longa yo ndambu- ndambu na bilumbu sambanu (6).

1. Kilumbu ya ntete : Bible 2 timoté 3 :16-17
2. Kilumbu ya zole: bisambu Filipo 4:6-7
3. Kilumbu ya tatu : kukumisa Nzambi Ps 149 :1
(Adoration)
4. Kilumbu ya iya : Kintwadi ya Bakristo (communion) Hebreux 10 :26
5. Kilumbu ya tanu: kupesa kitemwe, bisalu 1:8
6. Kilumbu ya sambanu: kulemfuka yakobi 1:22.

N.B: nge ta tendula na munkufi malongi ya ba vesets yai.

KUBINGA NA NZO YA BISAMBU

1. Bisambu ya kimvuka
2. Kulonguka Bible
3. Ecodim (école de dimanche)
4. Bimvuka ya mpila na mpila (comité)

SALA MAMBU YA NKAKA

- Nge fweti landa kaka na kusambila bantu ya ndimaka Yesu.
- Pesa bo malongi ya ta kumisa bo bambuta na lukwikilu na bo.
- Nge ta nata bo na dibundi ina ya kele landaka malongi ya Bible na makieleka yonso.
- Nata bo na bimvuka ya bisambu (groupe de prière intercession etc) ti ya kele longuka Bible (étude Biblique)
- Nge fweti tula ngolo na kusadisa bakristo ya mpa sambu luzingu na bo ya mpa kuyela.
- Pesa bo mpi kikesa na kulonga bantu ya nkaka nsangu ya mbote ya Yesu.

INVITATION : na nima ya kuzabisa muntu makieleka ya ndinga ya Nzambi, nge ta yufula yandi yai keti nge mene yamba (kubaka) Yesu bonso Mfumu, mpe ngulusi na nge mosi ? loma 10 :9. Ketu nge lenda sala yo sesepi yai ? Kana yandi kundima, luta na bisambu ya kubaka décision bonso yai : « Mfumu Yesu, mono kele ndima nde mono kele muntu ya masumu, mono mene ndima nde, Yesu kufwaka na zulu ya kulunsi na kifulu na mono. Bubu, mono zola yamba yesu na ntima na mono bonso mfumu mpe ngulusi na mono, katula masumu na mono yonso. Nge lolula mono. Mono kele bing ange, nge kota na ntima na mono. Nge twadisa luzingu na mono ya konso kilumbu. Nge safana, nge basika na zina ya yesu, mono mene buya nge na luzingu na mono Loma 10:13.

SALA FIOTI EXAMEN YAI:

- Kristo mene kota kusonga 3:20
- Mono mene kuma mwana ya nzambi Jean 1:12
- Mono mene baka ndolula ya masumu na mono Roma 10:9; Jean 5:11-13; Jean 3:36.

CHAP. V: MALONGI YA KUPEA KIKESA NA BAKRISTO YA MPA

1. **BISAMBU:** Bisambu kele ntangu ya mukristo kele baka sambu na kusolula ti Nzambi Tata na yandi. Na luyantiku ya ta pesa ndambu mpasi na mukristo yampa. Nge fweti sala kaka ngolo nge ta sala bisambu ya mbote malembe-malembe. Yantika bisambu konso kulumbu, samba bisambu ya muntindu na mutindu (kupesa merci, kupesa Nzambi lukumu, kulomba pardon) ti na ntangu ya kudia, ya kulala, kusamba sambu na bantu yonso, bantu ya maladi... 1 piérre 5 :7.

- Nki nge lenda samba diaka
- Kupesa merci Filipino 4 : 4-7
- Lomba mayele yakobi 1-3
- Pesa kizitu yonso na nzambi 1 piérre 5-7
- **Baka mayele yai :**
 - Konso kilumbu nge ta solulaka ti Nzambi, Marc 1 : 36
 - Sola kifulu ya pima, Bankunga 46 :10
 - Sonika mambu ya nge ta lomba ti ba mvutu ya Nzambi ta pesa nge na cahier.
 - Nge ta yantika kutanga munkanda ya Luc, na nima nge songa na Nzambi bakilo na nge (bamambu ya kele pesaka nge mpasi)
 - Ndima mpi nde Nzambi kele ti nge kilumbu na kilumbu (bilumbu yonso).

2. TULA NTIMA NA MPEVE SANTU

Mpeve-santu ke zingaka na ntima ya mukristo, na ntangu ya mukristo mene baka Yesu na ntima na yandi. bonso mfumu mpe ngulusi. Tala kisalu ya mpeve-santu :

- Kulonga bakristo mambu mingi sambu na Nzambi, jean 14 :26
- Kutwadisa ba kristo Roma 8 :26
- Mpeve kele zabisaka beto nde beto kele bona ya Nzambi Roma 8 :16-17.
- Yandi kele sambaka Nzambi sambu na beto.
- Yandi kele nataka beto na nzila ya kununga.
- Yandi kele fulusaka beto na nzila yakununga Galate 5: 16.
- Yandi kele fulusaka beto ti luzolo ya Nzambi Roma 5:5.
- Yandi kele kitulaka beto bonso Yesu kibeni 2Kolinto 3:28.
- Yandi kele pesa bakristo ngolo ya kulonga bamimpani sangu ya Yesu. Bisalu 1:8, Jean 1:32, tanga ba versets yina yonso, longuka yo mbote-mbote, pesa mpeve-santu nzila na kutwadisa luzingu na nge ya konso kilumbu, na nzila ya malongi ya Bible.

3. TULA NGOLO NA KUKWENDAKA NA KISIKA YA BISAMBU

Bisalu 2:42

- Ndinga ya Nzambi kele lomba na bakristo yonso na kuvanda bakristo ya luzolo ya kusamba konso ntangu. Bahébreux 10:24-25

- Bakristo yonso fweti zola kulonguka, sambu bo kusadila mbote-mbote kisalu ya mfumu na mpila nde lukwikilu nabo kuyela Efeso 4:11-16
- Beto bakristo fweti sadisa bantu ya nkaka . Roma 12:4-21
- Kupesa Nzambi lukumu:
 - a) kupesa Nzambi lukumu, Bankunga 149:1.
 - b) Kutuba mambo ya mbote ya Nzambi ke sadila nge. Bankunga 107:8.
- Pesa makabu na nge (dime to mosi ya kumi, offrandes) ti makabu na nge ya kimpeve na kisalu ya Nzambi.

4. VANDA NSADISI YA BANTU YA NKAKA:

Nzambi gulusaka beto, sambu beto kusadisa bantu mingi na kundima Yesu. Bantu mingi na kati ya Bible, bo sadisaka ba mpangi ya nkaka. Filipo 2:5-8 Yesu yandi mosi sadilaka bantu ya nkaka bonso Nsadi (seviteur). Jean 13:14 bantu mingi kele ti mfunu ya muntu na zola kusadisa bo na kundima Yesu. Bantu yayi kele na kati ya dibundu (Eglise) ti mpi ya nzo na nge...

- Sadila lukwikilu na nge na nzila ya kutwadisa bantu ya nkaka na Yesu Luc 22: 27.
- Beto bakana ba kilo (bizitu) beto na beto Galate 6:2.
- Pesa kitemwe to kimbangi na nge na nzila ya kusadisa bantu . 1 kolinto 9: 19-23.
- Twadisa na nzila ya kusadisa, Marc 10: 43-45.

5. NUNGA MABOKUTA TI BOMA

Mbala mingi ntima ya mukristo ta songa nde nge kele mwana ya Nzambi ve. Satana ta tula mambu yai na ntima na nge :

- Nge kele ngolo ve, bonso na ntwala.
- Nge kele kilo mingi ya masumu ti ba mambu yam bi mingi-mingi.

Kana bamambu ya mpasi kele kwisila nge, tuba nde zaba kaka nde nge gulukaka ve na luzolo na nge mosi, mpe na ngolo na nge mosi. Kansi nge mene guluka na nzila ya kulunsi ya yesu:

- Kristo me sumbaka nge, yandi me lolulaka nge.
- Nge kele na kubumbana na nsi ya maboko ya Yesu, Jean 10: 27-29.
- Nge kele na kati ya luzolo ya yesu Roma 8:35-39
- Ngolo ya Yesu kele bumbaka nge, 1 pierre 1: 3-5.

Kwikila ndinga ya Nzambi, kutula ve mabansa ti bangindu na nge kisaka-saka. Taha nde:

- Nzambi ke tubilaka nge na nzila ya ndinga na yandi.
- Ndinga ya Nzambi fweti samba moyo ti ntima na nge.

6. KONSO KILUMBU KELE TI MAMBU NA YO.

2 Kolinto 12:9

Mbala mingi lunzingu na beto kele ya kifuluka ti mabokuta mingi-mingi, sambu na bampasi. Mbala mingi ba mambu ya beto luta kubokuta yo kele salamaka ve muntindu yina. 2Kolinto 12: 9, Matayo 6:34.

- Bika nde Tata Nzambi kusadisa nge konso kilumbu na konso mambu yina nge ta baka lusadisú ya kufunga.
- Beno bokuta ve, Filipino 3:13
- Beno pesa Nzambi bakilo na beno, 1 Pierre 5:7,
- Kuyindula ve ba mpasi ya mene luta, kansi tala mambu ya mbasi ti kiese. Filippo 3:17
- Nzambi ta bika bana na yandi ve ata fioti; Hébreux 13:5
- Na mambu yonso ya kele pesa nge mpasi, nzambi ta sadisa na lusadisú ya Yesu, Filipino 4 :19.

7. NZAMBI TA SADISA NGE NA NTANGU YA KUMEKAMA.

Ba mambu bonso : maladie, mbongo ti ba mpasi ya mpila na mpila ya ta kwisa, zaba nde Yesu kele pene-pene na nge. Bible kele longá beto nde Nzambi kele zaba sambu na nki yandi kele meka lukwikilu na nge.

- Kumekama kele pesa mvutu ya mbote Roma 8 :28-29
- Kumekama kele kuyedisa lukwikilu, Jacques 1 :24
- Kumekama kele nata Yesu pene-pene na nge 2 kolinto 4:8-17
- Kumekama kele pesaka mukristo kikesa 1 pierre 5: 8-10

Bakristo ta mona ngolo ya Nzambi konso kilumbu, ata mpasi kwisila bo, kansi lusakumunu ta kwisa kaka.

8. NA NTANGU YA BA MPUKUMUNU 1 Kolinto 10:13

Mpukumunu Kele kwisilaka konso mukristo. Yesu yandi mosi lutaka na nzila yai ya mpukumunu ya satana, na lusadisú ya mpeve- santu, na nzila ya kusadila ndinga ya Nzambi, beto ta nunga satana. Matayo 4:4; Luc 4: 1-14 .

Tala mpila ya kununga ba mpukumunu:

- Na bisambu. Matayo 26: 41
- Na kulwata binwaninu (bisadilu) ya bitumba ya kimpeve. Efeso 6:10-18
- Na lusadisú ya mpeve-santu Galate 5:16-17
- Na kubuya banzala yonso ya nitu ti ya kileke 2 tim 2:22
- Na kubuya banzala yonso jacques 4: 7

Na kumanisa kitini yai, zaba mpi nde: nza4mbi ta nungisa nge kaka konso ntangu ya mpukumunu ta kwisila nge.

9. TUBA NSANGU YA MBOTE NA BANTU YA NKAKA

Zabisa bantu ya nkaka luzingu na nge yam pa ya kimvuka ti Yesu, na nzila ya kutuba na nge ti ya nsadilu na nge, yo kele mambu ya kuluta mfunu sambu na nge; yo ta pesa nge kiese ti kikesa kana nge sadila mambu yai mbote. Ba versets yai mpi kele mfunu mingi na kusadila sambu na moyo na nge. Matayo 4:19.

- Bikisa luzingu na nge kupesa kitemwe sambu na kristo
- Nge fweti kuyilama na kupesa temoignage na nge
- Kudipesa na lutwadisu ya mpeve-santu, 1 pierre 3 : 15, yandi ta pesa nge kiese, Bisalu 1 : 8
- samba sambu Nzambi kusadisa nge.

10. MAMBU YAI LENDA SADISA NGE NA KUYELA NA MOYO NA NGE YA MPA TI YESU-KRISTO

1. Na ntwala ya mpukumunu nge lenda tanga malongi yai yakobi 1 :2-4 , 12-15.
2. Na ntangu ya nge kele na mfunu nde Yesu kusadisa nge, nge tanga verset bonso yai, Bingana 3 :5-6.
3. Kana nge kele na mfunu ya pardon (ndolula) nge lenda tanga na 1 jean 1 :9, Hebreux 4 :15-16.
4. Ntangu ba mambu mingi-mingi ta kwisila nge, Bankunga 55 :22, 1 Pierre 5 :7.
5. Ntangu ya bigonsa, Bankunga 91 :121.
6. Ntangu ya nge kele ti mfunu ya mbongo. Bankunga 34:10.
7. Ntangu ya nge diaka na mpila ya kukanga ntima. Jacques 1 :2-4.
8. Kana ntima na nge kele zola sambu na mambu ya kuguluka. 1 Jean 5:11-13; Jean 3:16.